

# Puteri: Kritikan Dr. Mahathir mengecewakan

KOTA KINABALU 26 Okt - Naib Ketua Puteri UMNO, Rosnah Abdul Rashir Shirlin berkata, ahli parti itu kini begitu tersinggung dengan kritikan berterusan Tun Dr. Mahathir Mohamad terhadap Perdana Menteri, Datuk Seri Abdullah Ahmad Badawi.

Menurut beliau, walau apa pun alasan Dr. Mahathir membuat demikian, ahli parti jelas kecewa dengan pendekatan yang diambil itu.

Katanya, selama ini ahli parti diasuh dan dididik agar setia dan berdiri teguh di belakang kepimpinan yang ada tetapi Dr. Mahathir telah bertindak sebaliknya.

"Beliau sebagai negarawan yang begitu dihormati termasuk seorang yang bertanggungjawab menubuhkan Puteri tidak wajar bertindak demikian terhadap kepimpinan Perdana Menteri.

"Umum mengetahui Pak Lah seorang yang bersikap terbuka tetapi serangan berterusan seperti itu pastinya melukakan perasaannya sekali gus menyinggung ahli parti yang lain," katanya.

Beliau yang juga Ahli Parlimen Papar berkata demikian ketika ditemui pada majlis rumah terbukanya di sini, hari ini.

Beliau mengulas perbuatan Dr.

Mahathir yang terus mengambil sikap mengkritik pentadbiran Abdullah di samping membuat beberapa dakwaan baru yang mungkin akan memburukkan lagi suasana politik.

Dr. Mahathir Ahad lalu mengadakan pertemuan selama dua jam dengan Abdullah di kediaman rasmi Perdana Menteri di Kompleks Sri Perdana, Putrajaya.

Ahli-ahli UMNO sebelum ini melahirkan harapan agar pertemuan tersebut menjernihkan hubungan Dr. Mahathir dan Abdullah yang tidak harmoni sejak Dr. Mahathir secara terbuka membidas pentadbiran Abdullah enam bulan lain.

Rosnah berkata, sebelum pertemuan berlangsung, harapan ahli-ahli Puteri begitu tinggi untuk melihat hubungan dua tokoh itu kembali pulih seperti sedia kala.

"Tetapi kini kami terkejut dan kecewa dengan cara dan pendekatan Dr. Mahathir itu. Banyak saluran lain boleh diambil jika berasakan kepimpinan Pak Lah perlu ditegur atau dikritik.

"Puteri mahukan Dr. Mahathir mengemukakan idea-idea baru, yang dapat memantapkan lagi kerajaan hari ini bukannya menimbulkan suasana tidak selesa," tambah beliau.